



La nova squadra da l'URB: Curdin Toutsch, Nino Enderlin, Roman Pfister, Gaudenz Caveng e Ciril Berther.

FOTO C. CADRUVI

In um dal servetsch secret surpiglia l'URB

Radunanza annuala a Turitg

DA CLAUDIA CADRUVI / ANR

■ **Suenter in onn en suprastanza sa metta Roman Pfister a la testa dals Rumantschs da la Bassa. La radunanza annuala ha er elegi Nino Enderlin sco nov suprastant. Erica Vonmoos e Jon Carl Tall han dà lur demissiun.** «Jau less cuntinuar cun quai ch'ha funcziunà, ma er avrir novas pussaivladads», ha ditg Pfister la sonda passada als commembers da l'Uniun dals Rumantschs da la Bassa (URB). Ussa ch'el saja pensiunà haja el temp da surpigliar quest'incumbensa. Ma sia finamira saja era da dumagnar gliedud giuvna en suprastanza. Ils 3 da matg organischescha l'uniun in inscunter en la Giesserei ad Oerlikon nua ch'il nov president vegn a raquintar da sia vita. Da professiun è el forensicher ed el è stà vice-manader tar il Servetsch secret svizzer.

Il nov suprastant *Nino Enderlin* è creschì si a Scuol. El ha studegià romanistica, talian e rumantsch e lavura oz en l'informatica e telecomunicaziun.

Laud per la buna diala

Durant ventg onns è *Erica Vonmoos* s'engaschada per l'URB. Da ses consuprastant *Curdin Toutsch* ha ella survegnì grond laud: «Ti has prestà lavur exemplarica e cunscienzusa, has organisà sesidas ed inscunter e tegnì il contact cun las medias e las instituziuns. Jau na less betg savair quantas uras che ti has prestà lavur instancabla. La buna diala vegn a mancar en suprastanza.»

Il suprastant *Ciril Berther* ha engrazià a *Jon Carl Tall* che haja tegnì bun contact cun la Lia Rumantscha. Durant ses presidi haja l'uniun cumenzà cun ils inscunter che reuneschian giuven e vegl da differents idioms. Sin l'iniziativa da Tall haja la suprastanza emprendì rumantsch grischun. Il president haja cun mintga chaschun repetì ch'ils Rumantschs duajan duvrar uschè savens sco pussaivel lur lingua. El giaja cun bun exempel ordavant: «En sia famiglia a Zug vegn discursi gia en la terza generaziun rumantsch.»

Dapli daners da la Lia

Il cassier *Gaudenz Caveng* ha preschentà in quint che serra cun in surpli da radund 6500 francs. L'onn passà ha la Lia Rumantscha decidì d'augmentar la contribuziun per 10 000 francs sin 15 000 francs. Uschia po l'uniun organisar en l'avegnir dapli inscunter. Las contribuziuns dals commembers mainan 7620 francs en la cassa, vitiers vegnan donaziuns da radund 610 francs. Las expensas muntan a 9365 francs per l'administraziun ed a 7324 francs per inscunter.

20 000 Rumantschs vivian ordaifer il territori da tschep, ha ditg il secretari da la Lia Rumantscha *Martin Gabriel*. La diaspora saja in tema fitg impurtant che stettia a cor a l'uniun tetgala. *Carmen Dedual* daventa tar la Lia la persuna da contact per dumondas da la diaspora. L'uffizi da cultura saja pront da promover il rumantsch en la Bassa sut la cundiziun ch'ins inolteschia buns concepts, ha ella ditg. Dedual spera sin ina buna collavu-

raziun cun l'URB e las autras uniuns da la Bassa per pudair recaltgar ideas per concepts persuadents.

«In terribel temp per la SRG»

Il november e december da l'onn passà n'eri anc betg cler co ch'il pievel voteschia davart No-Billag, ha raquintà il president dad RTR *Oscar Knapp* ch'è stà envidà sco referent a la radunanza. Per ils radund 6000 collavuradors da la SRG ch'avessan pudì perder la piazza saja quai stà in onn terribel. Il di da la votaziun saja el stà a Cuira en la chasa dad RTR ed haja spetgà ensemen cun la directura *Ladina Heimgartner* sin ils resultats. Cura ch'ins haja annunzià l'emprim resultat – a Scuol avevan 86 pertschient votà na – han els l'emprim strusch pudì crair.

L'esit da questa votaziun haja er ina tscherta influenza sin auters pajais, per exempel la Germania nua ch'ins fetschia da preschent sumegliantas discussiuns areguard emetturs publics. Il na a l'iniziativa saja dentant stà in «na, ma...», conceda Knapp. En in sguard vers l'avegnir ha el enumerà pliras mesiras da spargn per la SRG ed RTR. Ins tschertgia sinergias cun tut ils acturs e stettia er en stretg contact cun la Lia Rumantscha areguard il project «medias rumantschas» che duai rinforzar la pressa rumantscha.

A l'inscunter rumantsch dals 3 da matg a las 19.00 en la Giesserei ad Oerlikon chanta il Chor dals paslers da Domat ed il nov president Roman Pfister raquinta da sias experientschas tar il servetsch da novitads.